

ADVIS DONNE
A L'ESTAT ET RE-
PVBLIQUE DE VENISE
par le Seigneur Antonio
Quirino Gentil-
homme Veni-
tien.

*Contenant les raisons & motifs d'icelle Republi-
que ; contre les difficultez proposées par
nostre S.Pere le Pape Paul V.*



M. DCVI.

Case

F

39

. 326

THE NEWBERRY
LIBRARY

16068



ADVISE DONNE' A
L'ESTAT ET REPUBLIQUE

de Venise, par le Seigneur Antonio

Quirino, Gentil-homme

Venitien.

En'ay peu durant ce trouble vni-
uersel & grand estonnement de
tous ceuls qui ont eu cognois-
sance des Bulles communitoi-
res, & des Censures qui furent
(comme l'on dict) dernièrement publiées
à Rome par le Pape Paul cinquiesme contre
la Republique de Venise, que ie ne me sois
grandement esmeu, pour estre amplement
instruiet comme le tout s'est passé de part
& d'autre, ayant veu non seulement les rai-
sons tres-iustes de la Republique pour de-
fendre son domaine temporel, & la liberté
de son Estat contre les pretensions du Pape,
mais aussi la modestie & reuerence dont elle
a vsé en traittant avec sa Saincteté: ce qui me
faict dire librement que le Pape n'a peu estre
induiet à ceste resolution par aucun iuste pre-
texte ou couleur que ce soit.

Mais d'autant que ny les pretensions de l'un, ny les raisons de l'autre ne sont cogneuës à vn chascun, j'ay estimé tres-expedient de les publier & faire voir à tous ceuls qui desireront les entendre, & principalement à ceuls auxquels Dieu a donné la charge de regir les peuples, afin que pensans en euls mesmes à quels termes on tasche de reduire leur puissance temporelle, & à quoy tendent les desseins de ceuls, qui sous quelques pretextes incognus ont conseillé la Saincteté d'vsurper sur euls vn plein pouuoir & authorité absoluë au preiudice de celle qui leur est donnée es choses temporelles, ils aduisent de procurer en general ce qui concerne le bien commun.

En quoy ie proteste deuant Dieu n'auoir autre but que l'vtilité publique, & de ne me vouloir esloigner en façon quelconque de la Religion Catholique, ny de la sainte Eglise, en narrant la pure & sincere verité du fait, duquel ie me peus dire estre autant bië informé en ce qui est de ceste affaire qu'autre qui soit, pour y auoir cōtinuellement assisté depuis le commencement iusques à la fin, & remarqué toutes les particularitez de la matiere, tāt au fait, qu'és raisons alleguées au contraire.

Les differens suruenus entre le Pape & la

Republique sont en effect : Que la Sainteté ^{ies} veult que les Ecclesiasticks soient en tout & ^{point} par tout exempts de la iustice Seculiere: de sorte que pour quelques oultrages, forfaits, & crimes que ce soient, ils ne puissent estre punis & chastiez par le Magistrat. Ce que le Pape fist entendre iustement au mesme tēps que le Conseil des dix (qui a droit & autorité par tout cest Estat de iuger & punir indifferemment toutes sortes de persones, tant Seculiers, qu'Ecclesiasticks, qui sont preuenus de crimes énormes, comme il a esté de tout temps obserué) sur la plaincte de quelques persones qui auoient esté interessées en leur honneur, vie & biens par moyens insolents & insupportables, ou pour miculs dire tyrāniques, pour le deub de la iustice, pour le repos public & le soulagement des subjects auoit commencé le proces, & fait mettre sous bōne & seure garde deux Ecclesiasticks, du moins qui en leurs habits & apparence sont tels, mais en effect par leur mauuaise vie, par les accusations intentées à l'encontre d'euls, & par les charges & informations se trouuent tellement coupables, atteints & conuaincus de tant & de si grands crimes, que leur impunité pourroit offenser le public, & apporter du mescontentement aux

parties interessées, de sorte qu'il y auroit à craindre que persone ne pouuant plus longuement supporter les desordres, & violences de tels Ecclesiasticks, finalement les particuliers n'en prinssent euls mesmes la vengeance avec grande confusion, & au scandale d'un chacun.

2 point Outre ce, la Sainteté voudroit qu'il fust permis à toutes sortes de gens tant Laïcs qu'Ecclesiasticks, de venir de toutes parts & en tel nombre qu'ils voudroient, dans la ville de Venise, & autres lieux qui luy sont subiects pour cōstruire des Eglises, Monasteres, & semblables edifices par tout où ils auroiēt volonté d'habiter & de se retirer, sans que la Seigneurie, ny aucun officier en tout le domaine d'icelle dans ou hors la ville de Venise peust sçauoir, ny mesmes s'enquerir quels ils seroient, ny d'où ils viendroient, & à quels fins ils s'y seroient acheminez; & encore sans les adstreindre à demander permission de construire leurs bastimens, contre ce que la Republique (sur des grandes & iustes considerations) en a ordonné depuis peu par vne loy expresse & conforme à plusieurs aultres, qui sont dés long temps establies à mesme effect, n'estant loisible, sous pretexte de compagnie Ecclesiastique, d'introduire és ci-

tez & forteresses des Princes, toutes sortes de gens, qui pourroient en plusieurs façons, comme nous dirons cy-apres, alterer la securité publique, troubler le repos des subjects, & encores par moyens illicites & frauduleux changer la forme & le gouuernement de l'Estat.

Finalemēt le Pape pretend que la Repu- *3 poine*
blique ne peut mettre à execution certaines loix qu'elle a establies en diuers temps pour seruir de reglement à tous les subjects en la disposition de leurs biens, & pour empescher qu'en les delaissant entierement aux personnes Ecclesiastiques, ils ne vinssent à frustrer leurs propres parens & heritiers de leur succession, & par ce moyen priuer aussi le Prince du secours qu'il peut tirer de tels biens, ce qui pourroit causer qu'avec le temps l'Estat se reduiroit à neant pour la grande & incroyable despenſe qu'il est besoing de faire ordinairement, tant pour la defense & protection des subjects, que pour la manutentiō de sa propre liberté, principalemēt au temps qu'il faut se donner de garde des ennemis puissants, & resister aux forces des infideles, lesquels apres auoir renuersé cest Estat, qui sert cōme de rempars aux autres, pourroient facilement se faire voye pour subjuguier &

ysurper le reste de la Chrestienté.

Ce sont les pretensions dont sa Saincteté fait mention en quelques Breuets qu'elle adresse à la Seigneurie pour l'induire à reuoker les loix touchant les biens immeubles des Seculiers, à ce qu'ils puissent paruenir aux Ecclesiastics, & en outre permettre la constructiō de nouueaux edifices à leur vſage & cōmodité, & finalement remettre entre ses mains les deux persones Ecclesiastiques preuenues de crimes tres-énormes, comme nous auons dit cy-deſſus. Dequoy sa Saincteté encore non contente, & accumulant pretensions sur pretensions, a voulu adiouſter en vne autre bulle cōminatoire, qu'elle a fait imprimer (comme l'on dict) sans en auoir fait mention aucune par ses Breuets, que la Republique a grandement erré en vne ſienne autre loy, voulant empescher la preferēce aux Ecclesiastics sur les biens qui sont appelez par ceste bulle Emphitheotics, encores que tels biens ne soient exprimez en ceste Loy, laquelle defend seulement la preference en general, & prescrit la mesme forme de iuger que celle qui a esté gardée par les Iuges Laïcs depuis plusieurs centaine d'années, & par vne coustume de temps immemorial en tous les differents qui sont suruenus entre

les Ecclesiastiques & les Seculiers sur ce subiect; comme si le iugement ne dependoit pas entieremēt de la Loy que le Prince a trouuē expedient de donner pour reglemēt aux Iuges.

Au contraire la Republique tient ses loix pour iustes, raisonnables, & vtils à son Domaine, veu qu'elles traittent seulement des choses temporelles, comme aussi elle estime estre necessaire, & de son debuoir tant pour maintenir l'autorité que Dieu lui a donnée, que pour contenir ses subjects, & entretenir son Estat en paix & en tranquillité, de punir les delinquants (comme elle a tousiours fait) principalement en matiere de cas priuilegiés & crimes extraordinaires.

Je croy qu'il n'y a homme de sain entendement, & sans passion, qui entendant simplement le faict, ne iuge incontinent que les raisons de la Repub. pour laquelle nous parlons, ont pour appuy & fondement l'honnesteté publique, la necessité, l'usage & la coustume, la pieté, la prudence & moderatiō dont elle a accoustumé d'vser en l'administration de son Estat.

Mais d'autant que quelqu'un pourroit estimer cela n'estre suffisant, & qu'il est necessaire d'approfondir les raisons de l'une & de l'autre des parties, pour en pouuoir bien iu-

ger, ne pouuant facilement croire que le Pape, qui est Chef de l'Eglise Chrestienne, soit venu iusques à ces termes sans quelque raison, qui le peust au moins avec quelque apparence induire & poulser à vne resolutiõ de si grande importance, ie les examineray particulièrement, & rapporteray mesmes ce qui se pourroit dire en pareil subiect touchant le merite de ceste controuerse, afin qu'on voye plus clairement que telles pretensions ne sõt iustes ni equitables, laissant à quelques autres de faire cognoistre les defaults qui se rencõ-trent en l'ordre des procedures, & en la forme du iugement, suffisans pour faire apparoir de la nullité des censures.

Plusieurs ont discoursu des causes qui peuvent auoir meu le saint Pere à ce qu'il a fait, aucuns estimants qu'ayant esté auparauant son Pontificat employé en diuerses charges à iuger les subjects de l'Eglise Romaine tant Ecclesiastiques que Seculiers, il auroit encore à present voulu continuer en l'exercice de ceste autorité, & s'en preualoir mesmes cõ-tre ceuls qui ne sont ses sujets: d'autres assurant cela estre prouenu de quelque sinistre opiniõ que sa Sainteté auroit conceuë de la Rep. sur quelques rapports peu fauorables & mensongers, qui ont peu auoir d'autant plus

de force en son endroict, qu'elle les a creu & tenu pour veritables, se persuadant facilement sur ce qu'on luy faisoit entendre (bien que sans aucune apparence de verité) que la Republique & le Senat n'estoient bien vnis ensemble, ni d'un bon accord touchant les presentes difficultez, & que la crainte des censures y pourroit encores apporter plus de diuision, & faire en sorte que les principauls seroiēt contraincts d'aquiescer à sa volonté. Quelques autres ont voulu dire que le Pape y a esté poulcé contre sa propre volonté, afin qu'estant continuellement embarrassé en vne multitude d'affaires qui luy pourroient causer vn grand trauail d'esprit, il en demeurast tellement affoibly & abbatu, qu'il donnast esperance à quelques-vns de bien tost voir vn nouveau Pontificat : les autres alleguans diuerses instigations & semblables moyens qu'il seroit long de raconter : mais croyant qu'il n'est point necessaire, ains plustost dangereux d'en rechercher plus curieusement les causes, i'aduouëray bien que ceuls qui ont esté autheurs de ce que sa Saincteté a fait, & qui l'y ont incité, n'ont manqué de quelques raisons aucunement apparentes, mais en effect nullement approuuées, ny receuës mesmes des plus prudens & aduisez.

tant de la Cour Romaine (comme nous auõs entendu par le rapport de beaucoup de personnes dignes de foy) que de tout le reste de l'Italie, & peut estre encore de toute la Chrestienté. Et d'autant que ces raisons consistent en peu de chefs, il ne me sera difficile de les deduire, en y adioustant la response à icelles, qui sera bien assez claire, & assez forte pour oster toutes les difficultez de ceste matiere, & contéter vn chacun pour scrupuleux qu'il puisse estre.

Mais auant qu'entrer en ce discours, il est prealable que ie touche les particularitez & considerations sur lesquelles la Rep. s'estant fondée s'assure de n'auoir point failly en ses arrests & iugemens, ny en ses loix, desquelles chacun peut auoir cognoissance pour auoir esté enuoyées par tout, suiuant l'aduis non du Senat seulement (la prudence duquel a tousiours esté fort recōméee) mais aussi de tres-excellents, & tres-doctes professeurs en toutes sciences: C'est pourquoy elle ne doit craindre les censures de sa Sainteté, lesquelles par le mesme aduis & conseil elle croit estre iniustes, & de nul effect & valeur.

Or en premier lieu, la Rep. estime n'auoir point failly en ce qu'elle a ordonné touchât les immeubles, à ce que les Seculiers n'en

puissent disposer au profit des Ecclesiastiques,
 ayant esté induite à ce faire par la necessité,
 par l'honnesteté, par la raison du droit tant
 diuin qu'humain, par l'exemple & commun
 vsage qui s'observe és autres Estats, & finale-
 ment par le soing qu'elle doit auoir de la reli-
 gion, & de sa conseruation: Oultre qu'elle y a
 esté comme contrainte & forcée par le deb-
 uoir & la iustice que Dieu l'oblige de rendre
 à ses subjects. Et qui est celuy qui se soit deuë-
 ment informé des grands biens que possedēt
 les Ecclesiastiques dans cest Estat, & combié ils
 les ont accru depuis vn certain temps en ça,
 & les augmentent de iour en iour (comme il
 estoit bien raisonnable que sa Sainteté s'en
 informast) qui ne voye vne diminution ap-
 parente des facultez publiques, à raison des
 charges tant réelles que personnelles que
 chacun en particulier est obligé de suppor-
 ter pour la conseruation du public? C'est à
 bō droit que les subjects sont employez avec
 leurs moyens & en leur propre persone à la
 defense commune en toutes sortes de char-
 ges, & aux frais qu'il conuient faire, tant or-
 dinairement qu'extraordinairement pour le
 public en tant de guerres par terre & par
 mer, aux armées, aux garnisons, aux forteref-
 ses, & munitions, & en tant d'autres necessi-

tez publiques , ausquelles ils sont obligez pour la manutention de l'Estat, & pour leur assurance particuliere: à quoy ils contribuent volontiers, les vns en fournissant certaine somme de deniers, & les autres y exposans leur propre persone. Ce n'est pas toutes-fois sans se plaindre que si grandes & extraordinaires charges deburoient estre également departies entre tant de biens, & de personnes, sans qu'une seule partie fust contraincte de porter tout le faix; & ont souuent faict entendre au Prince, qu'ils estoient pour succomber, s'il n'y tenoit la main & ne faisoit des reglements, comme on en auoit desia faict en autre temps sur semblable subject, pour subuenir à la necessité qui les oppressoit, en les assurant en quelque sorte que leurs forces ne seroient par trop diminuées.

Or la Repup. voyant que ce qui estoit osté aux pauvres subjects pour le donner aux Ecclesiastiques tournoit totalement à leur detriment, attendu que d'autant que ceux-cy augmentoient en commoditez, d'autant plus ceux-la s'affoiblissoient, & se reduisoient (s'il faut ainsi dire) en extrême misere & pauvreté, elle n'a peu moins faire que d'escouter les iustes doléances des subjects, & de pouruoir à leur necessité, estant chose tres-certaine,

qu'il falloit ou les exempter des susdites charges, eu esgard à la grande diminution qu'ils ont souffert de leur biens & facultez, ou bien n'y apportant aucune moderatiō, les amener à vne ruine totale. Or de les exempter il est impossible, attendu la necessité qu'il y a d'entretenir continuellement ces charges publiques, sans lesquelles on ne peut conseruer vn Estat; & de n'escouter leurs plainctes, ny leur donner aucun soulagement & support, c'est chose du tout iniuste & desraisonnable. Que pouuoit-on dōc faire? & si ceste consideration n'est receuë pour vne raison fondée sur la necessité, quelle autre le pourra estre? Le Prince doit-il abādōner ses subiects? Se doit-il abandonner soy-mesmes? Doibt-il laisser le Public sās thresor, l'Estat sans gouuernement, & les forteresses sans garnison? Doibt-il cesser de fortifier les places, de reparer les fleuues, & les chemins publics? Doibt-il demeurer sans l'assistance de ceuls qui sont necessaires à la cōduite des armées & aux charges militaires? Ne doit-il point garder & munir son Golfe? Doibt-il laisser en proye aux infideles, & aux corsaires la nauigation & le commerce, les mers, & les riuieres des Chrestiens, non seulement ses subiects, mais aussi des autres, qui recognois-

sent ce bon office ? Ce nous seroit peu d'honneur de voir & de permettre que tant de peuples demeurassent sans protection & sauuegarde, exposez aux dangers, pour laisser vn petit nombre de personnes en la iouissance particuliere de toutes leur commoditez, & en l'abondance de tant de richesses qu'vn chacun sçait qu'ils possèdent.

La loy doncques establie à la conseruation de tout l'Estat de ceste Republique ne peut en quelque façon estre blasmée; car s'il est ainsi que quelques petites citez & communantez ayent faict le mesme pour se conseruer, & ne demeurer tout à coup desertes & vuides d'habitans, comme Lorette, & la terre du Boys d'Alexandrie, patrie d'vn bon Pape qui le consentit, & le trouua fort bon, à plus forte raisõ cela doibt estre permis pour la conseruation d'vne Republique si grande & si bien ordonnée, & de tant d'Estats qu'elle possède, seruans de rempars cõtre la puissance des infideles & ennemis de la Chrestienté.

Il se trouue tant par la recherche veritable qui en a esté faicte, que par les registres publics, & tiltres des fondations, que les Ecclesiastiques possèdent en ce Domaine la valeur de plus de trête millions d'or en fonds de

terre, leur reuenu annuel se montant à plus d'un million & demy, & tous ces biens en general prouoiant des aumosnes & bien-faits des Seculiers, qui par deuotion & charité les ont donné à l'Eglise pour estre employez à l'entretenement des Prebſtres, à la construction & reparation des lieulx sacrez, à la nourriture des pauures, à la celebration du seruice Diuin, & generally à l'exercice de toutes œuures de pieté.

Partant c'est chose digne de conſideratiō, qu'encore que par tout ce pays, tant par le ſoin & vigilance des bons pasteurs & vrayſ Eccleſiaſtics, que de ceux qui gouernent l'Eſtat, on voye fleurir la vraye Religion, & le culte Diuin eſtre en grand honneur & recommandation enuers tous: vn grand nombre d'Eglifeſ, Monafteres, & autres lieux de deuotion ſi bien decorez & entretenus; neantmoins ceulx qui tirent les plus grands reuenus y apportent moins de bon exemple & d'edification. Que ſi on conſidere encore comme tant de richelſſes ſont inegalement diſtribuéſ, & que ceulx qui en tiennent la plus grāde quantité ſont en ſi petit nombre qu'ils ne ſont pas la centieſme partie en comparaiſon du tout, on ſ'eſtonnera bien d'auantage de voir que ce ſont eulx (ce que nous di-

sons avec vn extrême regret & poulfé du zele de l'honneur de Dieu) qui les employent moins à ce qu'elles sont destinées, & qui s'acquittent moins de leur debuoir, n'y en ayant que biē peu & des moins opulens qui se soucient d'accomplir la volonté & intention de ceuls qui ont donné ou laissé tant de biens.

On void des Eueschez, des Abbayes & Monasteres richement dotez, aucuns mesmes ayans plus de cinquante mille escus de rente, dans lesquels toutesfois se trouuent peu de persones qui facent leur debuoir de bien seruir Dieu, ains seulement ont soing de leur nourriture & commodité particuliere, & laissent la charge aux pauures d'administrer à l'Autel, & de seruir les Eglises, leur donnant à peine ce qui est necessaire pour le viure & entretenement: car le peu qu'ils ont encore pour la meilleure partie prouient des bien-faits & liberalité des Seculiers. Mais le Prince a esté contrainct de souffrir cest abus, & le souffre encore à present avec beaucoup de desplaisir, attendant le remede que la prouidence diuine y sçaura par sa toute-puissante main apporter en temps & lieu: Et ne se fault estonner de ceste grande patience, puis qu'il endure bien ce qui est sans comparaison plus difficile à supporter; que

tant de richesses qui deburoient estre employées à la defense & propagation de la foy & Religion Chrestienne, & conformément à la volonté & destination des bien-faïcteurs sont par diuers moyens transportées à d'autres Citez & nations estrangeres, non pour en bien vser & faire de bonnes œuures, mais plustost pour en abuser & en faire des dépenses superfluës en vanité & gloire mondaine, au scandale des gens de bien & de toute la Chrestienté.

Ce qui a donné occasion à plusieurs de se separer & retirer d'avec nous, biẽ qu'ils n'eussent aucun subiect de le faire, & n'y a point de doute que ce n'aye esté à cause de tels abus & maluersations qui se commettent touchant les biens de l'Eglise, voyans les Abbayes tenuës par des Estrangers, des pensions creées sur icelles, sur les Eueschez & aultres benefices conferez à des personnes hors de ce païs, le payement des Annates sur toute sorte de benefices grands & petits pour la collation & prise de possession, les charges ou taillons qu'ils appellent (qui ont esté innouées aus assemblées des Religieux) augmentées au double, les quartaires & quindenaires & aultres semblables exactions & impositions, oultre que quelques - vns par

moyens illicites, à l'aduanture poulsez de
 leur ambition ou aultrement, viennent se-
 crettement à la trauerse, & se font introduire
 avec fraude & mauuaise foy comme il est biē
 vray-semblable. Quelle apparence donc, ou
 quel honneur peut auoir sa Saincteté en ses
 pretensions, voulant que ceuls qui possédēt
 tant de biens & mesmes en abusent contre
 toute regle de pieté & de iustice, contre les
 bonnes meurs & les preceptes de vertu puis-
 sent encore iouir de plus grandes commo-
 ditez, & les augmenter au detriment & pre-
 iudice des particuliers, les spoliāt entiere-
 ment, & en fin les reduisant à vne extrē-
 me misere & calamité? Seroit-il bien seant
 de laisser vn petit nombre de persones s'enri-
 chir en peu de temps & se rendre maistre de
 tout le domaine mesmes avec immunité &
 exemption de toutes charges, & d'autre costé
 tant de peuples destituez de moyens & fa-
 cultez trauailler continuellement pour le
 bien commun & supporter toutes les incō-
 moditez tant en public qu'en particulier? Et
 d'auantage puis que les Ecclesiastiques en ceste
 Republique ont desia plus de biens qu'il ne
 leur en est besoing, & qui estans également
 distribuez au desir de la raison & de l'equité
 pourroient suffire sans comparaison à beau-

coup plus de personnes, quelle necessité y a-il de les accroistre, & leur en vouloir indeuëment procurer dauantage, veu mesmes que selon la doctrine des saincts Peres les richesses sont plus contraires, qu'elles ne seruent à leur ministere?

Il n'est permis à persone, non pas mesme par loy de nature, ni par le droit des gents de prédre par force ou par fraude ce qui luy est necessaire pour son aliment & sustentation: car la raison naturelle que Dieu a donné à tous les hommes y repugne, & semble que la nature leur ayeourny de moyens pour y resister & se defendre au contraire. La raison humaine aussi (soit qu'on vueille entendre celle qui consiste seulement au discours de l'intellect, ou bien celle qui a esté establie par lois & par coustumes) ne l'a iamais aproué: & en toutes les assemblées qui ont esté faites tant en ces derniers temps qu'és siècles passez pour le faict de la police, ou gouuernement d'un Estat, on n'a point trouué que cela fust loisible. La Religion Chrestienne pareillement tant s'en faut qu'elle le permette, que mesmes elle commande le contraire. Et neantmoins le Pape & les Ecclesiastiques voudroient vsr de tels moyens de fraude & violence contre les Princes & les subjects pour

leur oster la protection des Seculiers, & souz le nom de liberté Ecclesiastique vsurper le pouuoir de raurir à ceuls-cy leur moyens & facultez, & de priuer ceuls-là de leur puissance temporelle, & de l'autorité qu'ils ont d'empescher tels desordres, en y apportant le remede necessaire par le moyen des loix & ordonnances qui ont esté de tous temps pratiquées en tous Estats, Royaumes & Provinces, & approuuées pour iustes & conformes à la Religion Chrestienne enseignée par Iesus-Christ son vray Chef, par ses Apostres & Disciples, & par tant de saincts Peres & Docteurs de son Eglise. Et d'acquiescer à telles pretensions, que seroit-ce autre chose, sinon destituer le Prince de sa propre dignité en luy deniant le pouuoir de regir son peuple, comme il appartient, & oster aux subjects la regle qu'ils doibuent tenir pour se bien gouverner en leurs biens & en leurs personnes? Quoy faisant il ne resteroit au Prince que le simple nom seulement, & aux subjects vne cōfusion qui les combleroit de mal-heurs, & d'une ruine desplorabile. Car ceste violence est telle, qu'elle blesse & offense également le Prince & les subiects, estant ces deus parties si estroitement conioinctes que l'iniure qui leur est faite doibt estre reputée non

comme faicte à diuerſes perſones, ains à vne meſme ſeulement, & principalement quand la domination du Prince n'eſt violente ou tyrannique, mais doulce & legitime, comme par la grace de Dieu on recognoiſt eſtre celle de ceste Republique.

C'eſt auſſi vne choſe toute claire, que la puissance & iuriſdiction du Prince legitime n'eſt aultre que celle meſme d'un Peuple, qui vnanimēt aſſemblé par vn commun accord & conſentement faiët & ordonne ce qui luy ſemble neceſſaire pour le gouuernement & la police, & ainſi les loix & conſtitutions du Prince ont autant de force & autorité cōme ſi tous les ſubjects congregez enſemble les auoient eſtablies chaſcun en particulier & ſelon ſon deſir.

Donques comme il n'y a perſone de ſi peu de iugement qui veuille ſouſtenir qu'une communaulté libre, & qui n'eſt ſoubs la puissance d'aucun, n'aye le pouuoir de diſpoſer de ſoy & de ſes biens propres ſelon ſa volonté, ſans qu'un aultre l'en puiſſe blaſmer ou luy raurir ceste puissance & liberté: tout de meſmes le Pape ny aultre que ce ſoit ne peut avec iuſte raiſon ſe formalifer, & moins encore s'ingerer à vouloir reprendre ce que la Republique a faiët touchant

les choses temporeles par ses lois & ordonnances, esquelles en effect consiste le mesme pouuoir & autorité qui est en tout les peuples qui viuent sous la douceur & iustice de sa domination.

Que si toute persone priuée peut disposer de ses biens comme bon luy semble, ordonner de sa succession à perpetuité au profit de quelqu'un & à l'exclusion d'un autre, soit Ecclesiastic ou Seculier; si cela se peut introduire & permettre par l'usage, par les coustumes & les loix, sera-il defendu au Prince d'en faire de mesme? au Prince dis-je qui est vrayement le maistre de la vie & des moyens des subjects? C'est chose certaine que les loix ciuiles & humaines tant par ceste raison que par infinies autres qu'alleguent les Iuriscultes à ce propos, veulent que la Republique & tous autres Princes Souuerains ayent pouuoir de faire telles constitutions, qui prohibent aus subjects l'alienation des biens au profit de certaines personnes, sans qu'aucun s'en puisse formaliser avec raison, parce qu'une loy faicte de telle sorte ne commande particulierement à aucun, ains s'estend seulemēt sur les choses qui sont purement & simplement de la iurisdiction du Prince, comme en ceste matiere les loix

dont est question regardent seulement les Laïcs, & les biens qu'ils possèdent. Et bien que sur les facultez des Ecclesiastiques les princes puissent en certaines occasions faire le semblable pour le bien public quand la nécessité le requiert, comme il n'est repugnât, ains plustost conforme à la doctrine de l'Eglise Catholique: toutesfois puis que nous ne traictons pas maintenant ceste question, apparoissant clairement que ces loix que lon veut mettre en doubte, ne font mention d'autre chose que des biens des Seculiers, il fault croire & tenir pour resolution infaillible, que la Republique a iustement eu par le passé, & a tout de mesme à present vn souverain pouuoir de faire telles loix: autrement elle demeureroit destituée de ceste puissance qui est la principale & comme essentielle, & du tout necessaire à vn Prince; ce nom signifiant proprement vray Legislatteur & gouverneur de ses subjects.

On adioust icy que se trouuant en beaucoup de Villes d'Italie des Statuts particuliers, qui contiennent des reglemēts du tout semblables, ou fort peu differents sur la mesme matiere, à ce que les biens des Laïcs ne puissent estre en aucune façon transferez aux Ecclesiastiques, comme à Genes & à Siene,

d'où sa Sainteté a pris son origine, & aussi en quelques autres villes anciennes, qui ont tousiours esté bien policées: Ce seroit vne chose defraisonable, que ceste Republique qui domine sur plusieurs villes, dont les Statuts particuliers portent tels & semblables reglements faicts & obseruez en tout temps par les bons citoyens d'icelles, n'eust la puissance d'en faire de mesmes: Car ainsi elle viendroit à se reduire en vne moindre & inferieure puissance & iurisdicció que ses propres subjects.

Mais que sert d'apporter icy l'exemple des villes d'Italie, puis que les Prouinces entieres, voire tous les Royaumes de la Chrestienté ont faict le semblable: comme il se pourroit iustifier (si on le reuoquoit en doute) par les extraicts des loix de Germanie, gouuernée des Empereurs par tant de siecles; qui ensuiuant l'ordre de leurs predecesseurs ont peu donner des loix sur le faict du temporel à vne grande partie du monde, mesmes à la ville de Rome depuis l'auenement de Iesus-Christ, par vn long espace de temps assez notoire à tous ceux qui ont la cognoissance des choses passées: On le pourroit aussi monstrier par les loix du tres-illustre & tres-Chrestien Royaume de France, si bien meri-

tant de la Chrestienté & de la saincte Eglise, & par celles du Royaume d'Espagne, dont les Rois ont esté si grâds obseruateurs de la vraye Religión qu'ils ont acquis le nom de Catholiques. Les Royaumes de Portugal & d'Angleterre au temps que leurs Rois estoient obeïssans au Sainct siege Apostolique ont institué & obserué les mesmes loix, ainsi qu'il se remarque dans les Auteurs bien approuuez, comme pareillement la Sicile, la Bourgogne, la Flandre, & autres Prouinces, si biē que pour les abolir il faudroit destruire la prudence & sagesse de tant de Legislateurs & grands Rois, renuerfer leur puissance, & l'vsage de tant de peuples qui leur sont subjects, & peruertir l'estat de toute ceste partie du monde, où reside la vraye Religion Chrestienne, qui n'a pas besoing de tels mouuements & reuolutions.

On peut oultre ces raisons pour plus grande iustification de la validité de nos loix, tirer vn argument de l'exemple & imitation de nos Ancestres, qui ayant tousiours sainctement gouverné cest Estat, & rendu des preuues tres-euidentes de vertu & pieté par toutes leurs actions, en ont toutesfois depuis plusieurs siecles institué de semblables, comme il se void aus Registres publics, aus

Archives, & Statuts particuliers de ceste Republique, qui en pareils cas ont esté par euls faicts depuis trois & quatre cens ans sans rechercher de plus loing, portants reglements semblables pour l'indemnité des subjects & la seureté publique: Mais pour cela les Papes precedents (desquels on ne doit presupposer ou tant de negligence, ou si peu de zele à la religion, qu'ils ayent entieremēt despouillé le soing de bons Pasteurs, & l'affection deuë au public) ne s'en plainquirent iamais, ny voulurent y attenter en ceste façon, sçachants bien qu'ils ne le pouuoient iustemēt faire contre la force & equité de tant de raisons, & contre le secret mouuement de leur propre conscience, qui ne leur permettoit point de blasmer en aultruy ce qu'ils auoient faict euls mesmes, & dont ils auoient donné l'exemple. Car chascun sçait que par leur Constitutions ils ont defendu aus Ecclesiasticks d'aliener leurs biens aus Seculiers en quelque maniere que ce soit; & que si par fois ils permettent telles alienations, c'est seulement au profit des Ecclesiasticks & en cas que leur aduantage y soit tout euident, & par consequent au grand interest & detriment des Seculiers. Que si les Papes precedents ont acquiescé à ces loix dont nous ve-

nons de parler comme iustes & equitables, à plus forte raison nostre S. Pere le Pape qui est à present deburoit approuuer celles dont est question, qui sont accompagnées de telles conditions, qu'elles peuuent rendre tesmoignage de plus grande pieté, & de plus grand respect à l'endroit des Ecclesiastiques, ne les excluant pas du benefice des biens meubles, & leur permettant quant aus immeubles de les vendre, & retirer le pris qui en prouient: Et tant en cest Estat qu'en aultres lieux ils peuuent posseder des biens d'aultre nature par permission du Prince, laquelle se peut facilement obtenir ayant desia esté par plusieurs fois octroyée à ceuls qui l'ont requise, mesmes depuis l'institution des lois presentes: quoy estant, que peut-on trouuer à redire en ce qui a esté fait par la Repub. avec tant de raison, d'equité, de iustice, de necessité, & à l'exemple de toutes les nations?

Croira-on que toute la sapience, la iustice, la pieté, & la religion de tous les peuples, de tous les Princes, de toutes les Prouinces, de tous les Royaumes, de tous les aages, & de tous les siecles soit renfermée seulemēt dans l'esprit de ce peu de personnes, qui donnans des mauuais conseils à sa Saincteté font paroistre bien souuēt qu'ils ne sont guere bons

cōseillers pour l'vtilité publique? On pour-
roit à ce propos amplement discourir quād
& comment, & à quelles personnes la diuine
prouidence a voulu departir de si belles ver-
tus, & de là on viendrait à cognoistre si telles
actions qui s'acheminent à la perturbation,
à la discorde, à la subuersion de la paix &
du repos de tant de peuples, peuuent
proceder d'icelle, & par mesme moyen on
auroit vn beau subject de traicter si elles sont
conformes à l'humilité, à la patience, au mes-
pris des choses mondaines, & à tant d'autres
vertus diuines & humaines, que nostre Sei-
gneur & Sauueur Iesus-Christ a laissé pour
vraye image & vif exemple à ses successeurs
au gouuernement de son Eglise.

Mais parce que la matiere que ie traicte
m'appelle ailleurs, ie passeray oultre pour
venir à vne aultre loy faicte par la Repu-
blique, contenant que moyennant sa per-
mission & consentement, & non aultrement
on puisse construire nouuelles fabriques de
Monasteres, Eglises, & autres lieux sembla-
bles, en quoy comme i'espere la Republique
ne se trouuera moins fondée en bonnes rai-
sons qu'au precedent discours touchant l'a-
lienation des biens Laïcs. Et en premier lieu
pour vne raison tres-solide ie mettray en

avant l'opinion des Iurifconsultes, lesquels
 par la disposition des loix antiques, & des
 decisions par euls appellées (*Responsa pruden-*
tum) qui ont tousiours eu autant de force &
 autorité que les loix mesmes, resouldent en
 termes clairs & expres que le Prince est Sei-
 gneur Souuerain de toute l'estendue de son
 domaine, & (comme ils disent) de tout le va-
 gue de l'air qui l'enuironne. A cause dequoy
 il n'est licite à aucun d'entrer en iceluy sans
 son consentement, & beaucoup moins, de
 s'en rendre maistre & propriétaire sans sa
 permission expresse: à quoy ils adioustent
 que s'il n'est permis d'vser de force à l'encon-
 tre d'aucune persone priuée pour entrer en
 sa maison, ou dans sa possession afin d'y edi-
 fier des Eglises, Monasteres, ou autres basti-
 mēts dediez au Culte diuin, cōme la doctri-
 ne commune & toutes les loix nous l'ensei-
 gnent, beaucoup moins telle violence peut
 estre permise à l'encontre du Prince, qui a
 vne puissance plus parfaite & absoluë sur
 les terres où il domine, que n'a la persone
 priuée sur ce qui luy appartient en particu-
 lier. Mais a-on iamais veu que quelqu'un
 se soit ietté dans la possessiō ou maison d'au-
 truy contre sa volonté sous pretexte de li-
 berté Ecclesiastique, de charité, ou de reli-

gion, pour y consacrer ou administrer des Sacrements, ou pour enseuelir des morts, bien que telles œuvres soient tres-bonnes & loüables? Celuy qui l'auroit entrepris, n'en feroit-il pas dechassé par force? Que diroient les particuliers si on vouloit sur leur maison s'attribuer vne telle puissance? C'est chose certaine que s'en estonnants quand ils ne pourroient eux mesmes repousser ceste force, ils auroient recours au Prince à fin d'estre par son autorité garentis & defendus de telle offence & iniure: & qu'un Prince iuste ne pourroit leur denier secours apres auoir entendu leurs iustes doléances. Or ce que le prince peut faire pour la defense & conseruation equitable de ses subjects, ne le pourra-il pas faire pour le particulier, & pour le bien public, l'ordonnant ainsi comme bon & salutaire? Et en quoy consiste autrement la loy qui permet d'edifier, sinon qu'à prendre garde que les fabriques soient deuëment faictes, & avec le consentement de celuy qui en est maistre: lequel estant de deux sortes differentes, à sçauoir par autorité publique ou priuée, il faut soigneusement examiner si l'une & l'autre n'est point concurrente en l'alienation des places qu'on veut employer à ces nouuelles fabriques, &

si le

si le dommage & preiudice qui en peut naistre est esloigné de l'une & de l'autre. Et laissant à discourir comme le possesseur particulier & le voisin encore peut estre lezé ou par fraude, ou par force, ou bien par d'autres moyens & tromperies, qui sous maints beaux pretextes se pratiquent auiourd'huy au monde pour s'approprier le bien d'autrui, d'où les familles entieres & les personnes qui leur sont conioinctes ont resenty & ressentent encore de grandes incommoditez & dommages, il suffira d'auoir legerement touché ce poinct sans passer plus outre.

Il n'est pas hors de propos de dire quelque chose de l'interest public, qui est le but auquel la Republique a visé par vn bon & prudent conseil. Or on trouuera dans la Ville de Venise enuiron cent cinquante edifices d'Eglises, Monasteres & d'autres lieux de deuotion; entre lesquels on peut remarquer particulièrement plusieurs Monasteres de si grande estenduë, tant pour la commodité des logis, que pour les autres appartenances & dependances des Courts, des Cloistres & des iardins, qu'on peut dire auëc verité qu'ils occupent la moitié de toute la ville, là où les Citoyens tous ensemble de quelque grande qualité & condition qu'ils soient à compa-

raison de la grandeur de ces lieux, où mesmes les habitans des autres villes sont fort estroitement logez: & toutesfois ils ne se sont iamais voulu formaliser de ceste grande commodité des Ecclesiasticks, ains ils l'ont tousiours de plus en plus procurée & reputée pour vn bien vniuersel, ayants ces Edifices esté construits en tout temps de leurs deniers & facultez, avec vne extrême contentement & consolation de leur esprit, de quoy lon peut voir des remarques tres-veritables dans les Chroniques & dans les Annales tant publiques que particulieres: Et le reglement dont est question n'a esté fait pour ce subiect ny à ceste fin, veu qu'en suivant tousiours les traces de la pieté & grâde religion de nos Ancestres & predecesseurs, on ne laisse encore à present de fonder nouvelles Eglises, & nouueaux Monasteres avec permission publique, qui a esté concedée plusieurs fois depuis la loy presente, & ayant esté donnée si facilement apres que lon s'est deuëment informé du lieu, des personnes, & d'autres semblables particularitez ausquelles il est nécessaire d'auoir égard pour tenir vn bon ordre en la police & au gouuernement: nul ne peut douter que lon n'en doibve faire de mesmes à l'auenir aussi bien en la vil-

le de Venise comme en tous les autres lieux qui en dependent, bien qu'il ne s'y trouue aucun default, attendu qu'ils sont tous remplis de tres-excellents edifices, tres-riches Monasteres, & d'autres lieux dediez aux oeures de pieté, avec tant de magnificence, tant de splendeur & appareil tendant à l'honneur & culte diuin, que cela demonstre bien que la vraye religion reside au cœur de tous les habitans d'iceuls: Mais la cause & la fin de l'institution de ceste loy a esté seulement l'assurance & tranquillité publique, qui pourroit estre facilement troublée, quand à l'occasion de nouuelles Eglises & Monasteres, où bien souuent sont receuës nouuelles troupes & congregations d'hommes incognus, on donne liberté d'introduire nouuelles coustumes & maniere de viure, d'où viēt que les plus simples, tant nobles que roturiers n'estants si capables de cognoistre leur fraude se laissent sous pretexte de Religio persuader, & attirer à leur exemple avec vn notable interest & preiudice de la liberté publique, & avec peril d'une tres-pernicieuse semence de ces diuisions & dissensions qui par telles voyes se sont autrefois excitées, & desquelles la sincerité des subjects de cest Estat, & l'uniformité, ou plustost l'un-

nion qui est en la police, par la grace de dieu, & avec la vigilance continuelle qu'on y apporte en public par sages cōseils, a tousiours esté fort esloignée. Et est-il biē possible qu'en ce temps on n'en ait recognu des effects tres-manifestes, puis qu'il est notoire à chacun quelle autorité se sont aquis, & à quelles negociations se sont apliquées quelqu'vnes de ces compagnies? Que si la modestie ne retenoit celuy qui escrit de passer plus outre, assuremēt on descourriroit des choses qui apporteroient par leur desordre & inciuilité (que lon peut biē appeller malice) beaucoup de desplaisir à celuy qui en entendroit le discours. mais ie demande, qui seroit le Prince qui voulust souffrir qu'en ses Prouinces, & en vn temps si suspect & si plein de machinations & de perfidies se logeassent des hommes à luy incognus & estrangers par tout où bon leur sembleroit, & où ils trouueroient plus de commodité? ne seroit-il pas raisonnable auparauant que les y admettre, de sçauoir leur condition & qualité? de cognoistre leur fin & intention, & d'où ils viennent, & de sonder & voir la consequence de tout ce qui pour l'vtilité, ou pour le dommage du Prince ou des subjects pourroit naistre & prouenir à cause de leur as-

semblée? Certainement ce ne seroit pas le fait d'un sage Prince, de mettre en arriere le soing de tels aduis & cōsiderations, veu que sous le pretexte de Religion, qui sert bien souuent de couuerture à vne autre fin, les actions d'aucuns sont venues à telle euidence, qu'on a clairement recogneu qu'ils ne tendent qu'à lier & captiuer les esprits de ceuls qui sont attirez par leurs pratiques & menées, en telle sorte que ni la puissance ou autorité du Prince, ny l'obligation de la Nature, ou quelque autre iuste respect ne les a peu empescher de se ranger sous leur arbitre, pour dependre seulement de leur volonté en toutes choses humaines & temporelles. Et j'ay veu en certains lieux de cest Estat que quelques semblables compagnies ont tasché par tous moyens d'introduire des Escoles & des Congregations, dans lesquelles tous ceuls qui estoient receus s'obligent à se trouuer souuent ensemble, prester serment & faire vœu solennel de suivre leur chef en toutes occurrences & en tous euenements pour defendre son ordre, ses regles & constitutions, sans que le public eust rien à desmeller avec euls: Ce qui n'est comme lon void autre chose qu'un principe de diuision & de sedition secrette, d'où peu

à peu par progrez de temps viédroient à sortir des flames & embrasemens, qui ne seront pas aisez à esteindre. Ce n'est pas vne chose fort esloignée de nostre âge, que pour les crimes enormes d'vne telle Congregation de Religieux, la Republique a esté contrainste de les chasser de la ville, dequoy elle a esté louée par tout, à bon droict & avec raison. Je laisse à dire quelles doctrines ils essayent par tels moyens de semer, au preiudice & diminution de l'authorité du Prince, les imprimant doucement aux tendres esprits de ceuls qui à l'auenir peuuent estre ministres de leurs desseins: mais ie n'en veux pas traicter dauantage pour le present, puis que l'importance & la consequence du faict demande vne autre temps & plus de commodité pour en discourir. Mais pour reuenir à nostre subject, il n'est pas possible qu'vne personne de iugement ne s'estonne de voir que le Pape & les Ecclesiasticks veulent que la Republique ne cognoisse & ne pouruoye à ce qui est de l'assurance & conseruation d'un si grand nombre de villes & de forteresses qu'elle possède, dans lesquelles si on entretient garnisons ordinaires avec tout le soing & vigilance qu'on y peut apporter pour leur sauuegarde, & si on employe

les facultez & thresors publics pour les rendre fortes & imprenables aus ennemis par le moyen des murailles, remparts, fossez, & autres semblables fortifications de grande despence, est-il pas encore raisonnable & necessaire qu'elles soient garenties des accidents que peuuent causer ces grands Edifices, mettant empeschement à leur defense, & donnant aduantage à l'ennemy de les offenser? & si quelqu'un entreprend d'eriger des Eglises ou Monasteres, (qui sont quelquesfois comme grandes machines & d'immense estendue) dans les remparts ou pres des murailles, hors ou dans la ville, le Prince & la Republique le pourrôt-ils point empescher? Et ne sert en rien de dire qu'on ne veult edifier en intention de nuire, ny en lieu d'où l'on puisse craindre tels desordres & inconuenients, car on respondra qu'il est necessaire que ceste distinction de lieu & de temps & d'autres semblables circonstances soient cognues de quelqu'un, & aultre n'en doibt cognoistre, que le seigneur du lieu, puis qu'il y va de son peril ou de son assurance, laquelle ne peut estre remise au iugement d'autrui: d'où s'ensuit clairement qu'il est en la puissance du Seigneur de le permettre & prohiber comme bon luy semble: Ce

qui est en effect le contenu & la substance de la loy.

Mais il ne faut doubter que hors ces iustes considerations la Republique n'en donne permission, puis qu'elle l'a tousiours faict par l'espace de tant de siecles, durant lesquels toutesfois semblables loix par elle instituées estoient en vsage, & se gardoient tantost en vne façon, tantost en vne autre, de quoy rendent assez en preuues tant de Temples, Eglises, Monasteres & autres lieux de deuotion desquels la ville de Venise & les autres de son Domaine sont remplies; & tous en diuers temps ont esté fondez non seulement par autorité publique, mais par le public mesme, qui en general & en particulier a contribué pour la construction & fondation de ces lieux, les dotant de ces grandes richesses & reuenus dont nous auons parlé cy dessus: Et sont en tel nombre & qualité qu'ils pourroient commodément suffire à deus, voire trois fois autant de Prestres & Religieux qu'il s'y en trouue à present actuellement residents pour faire le seruice Diuin. Il seroit par-auēture plus raisonnable d'aduiser, comme ont faict autresfois les Grands Princes & Empereurs, à faire vne plus egale distribution de ces rentes, & vn meilleur reiglement

pour l'entretien & sustentation de ceuls qui en iouissent, que de se rendre facile à permettre d'y en adiouster & fonder de nouvelles, oultre que se treuuant desia plusieurs Religieux & beaucoup de Monasteres de fondation antique, & par leur bon exemple assez cognus sans auoir aucun reuenu Ecclesiastic, il est necessaire qu'ils soient pour la plus-part nourris & entretenus des aumônes qu'ils reçoient iournelement de la pieté & deuotion des Laïcs, par les bienfaicts desquels leurs Eglises aussi sont bien souuent reparées & enrichies. A cause de quoy voyant que les moyens des Seculiers se pourroient en fin espuiser, comme estants limitez à certaine portion & quantité, il est besoing d'y pouruoir, de crainte que venans à defaillir, & ne pouuant plus suppleer tant à ceux qui sont à present qu'aus aultres qui pourroient estre introduicts de nouueau, on ne voye les vns & les autres tomber en telle necessité, qu'il s'en ensuiuroit plustost du scandale, qu'un accroissement à l'edification Chrestienne, ou les anciens (qui par vne longue suite d'années ont donné tant de preuues de leur pieté) estre spoliez par les nouueaus, ce qui seroit contre toute equité & au grand mescontentement de tous les

Peuples, qui se verroient priuez de ces Religions & de ces personnes, qui par plusieurs siecles passez se sont tant trauaillées pour le bien de la Religion, avec tant de bonnes œuvres faictes à l'honneur & à la gloire de Dieu, comme il est assez notoire à chascun.

Et qui ne sçait combien de fruct & quel bien ont apporté au monde les Religions cognuës & approuuées? Que si lon trouue escript des fondateurs & instituteurs d'aucun que par visions apparues aus Papes ils ayent releué l'Eglise presté à tomber, & depuis qu'estant sanctifiez ainsi par euls-mesmes, & par vn si grand nombre de leurs disciples qui ont suiuy leurs vestiges, les imitants en leur doctrine, pieté, humilité, sainteté de vie, & en tant d'autres vertus dont il auoit pleu à Dieu les dotier; ce seroit chose indigne de les laisser maintenant à tel mespris, qu'ayant peu de soing de leur conseruation, on se redist d'vn costé coupable d'extreme ingratitude, & de l'autre blasmable d'imprudence ou plustost legereté, puis qu'en abandonnant ainsi le bien certain & assésuré on voudroit courir à l'incertain, & possible au danger.

Et ne fault point obmettre de dire à ce propos, que dans la ville de Venise & par

tout cest Estat se trouue vn grand nombre
 de Monasteres de Religieuses; qui dediées à
 Dieu par vn vœu perpetuel de virginité, of-
 frent à la Majesté diuine continuelles prie-
 res pour impetrer sa misericorde & clemen-
 ce; quoy estant, ne feroit-ce pas impieté de
 leur soubstraire le peu de moyé qu'elles ont
 seulement par les bien-faiçts & charité des
 Laïcs, comme il auientroit sans doubte, si
 par l'augmentation d'autres Monasteres de-
 diez à nouuelles personnes, les aumosnes
 qu'on leur donne simplement pour leur
 sustentation estoient retranchées ou distri-
 buées aus autres? Et icy fault regarder si la
 pretenſiõ du Pape doit auoir lieu, que tant
 de vierges & de religieux si bien merittans de
 ceste ville & des autres par leurs ieunes &
 prieres cõtinuelles, se tournassent avec sou-
 spirs & larmes à ceste Republique & à tous
 les peuples d'icelle, leur disant, que confor-
 mément à l'obligation de leur naissance, & à
 la cause de leurs vœux ils ont tousiours ren-
 du de vrays tẽsmoignages & signes d'amour
 & d'affection enuers la Patrie, & des effects
 d'honneur & reuerence enuers Dieu autant
 que leur foiblesse & fragilité le peut porter,
 qu'ils ont obseruè la foy, & consommè tou-
 te leur course spirituelle, & qu'estans aban-

donnez & delaissez de la charité de leur Patrie, ils remettent en ses mains la iustice de leur cause: Que si telles plainctes auenoient, que pourroit-on attendre du Ciel autre chose qu'une iuste & rigoureuse vengeance pour la punition d'une telle impiété? Mais il est certain que cela n'auindra iamais, parce que la Republique & ceux qui la gouvernent ne sont pas de telle nature qu'ils puissent souffrir vn si grand abus & desordre, & fault plustost croire que lors que le Pape & les Ecclesiastiques seront bien informez de tant de raisons si preignantes, & de si grandes considerations, ils pourront changer d'aduís, comme il est bien seant aus plus sages & mieus aduisez, quand lon voit manifestemēt qu'on le peut changer en mieux.

Je ne laisseray d'adjouster briuemēt pour ce qui concerne ce chef deus choses que i'estime assez cōsiderables: La premiere qu'à l'occasion des nouuelles Eglises, Religions & Monasteres qui ont esté introduicts par le passé, plusieurs des vieilles Eglises, & autres liés sacrez ont esté non seulement amoindris: mais pour auoir mis des rentes en commande seulement à vne personne, on a veu avec vn scandale vniuersel les Eglises abandonnées, les Monasteres delaissez, & le serui-

ce diuin mis en arriere; & ce qui deuoit estre employé pour la conseruation & reparation des lieux, pour l'entretènement des Prestres, & pour la nourriture des pauures, a esté au contraire bien souuent mal employé & à mauuaise fin & intention, d'où lon peut bien cognoistre que plus s'accroissent les nouuelles Religions ou nouveaux Monasteres, plus on donne occasion de remettre les rentes des anciens sous les tiltres de commande, qui en effect n'est autre chose que les appliquer à vn vsage bien different de celuy auquel elles estoient destinées.

La seconde, que ces loix que la Republique a faict en tout temps sur le mesme sujet (puis que laissant les plus anciennes on en peut voir de l'année 1337. de 1459. de 1515. & 1591.) n'ont iamais porté preiudice à la Religion & honneur de Dieu ny, aus gens d'Eglise. Et s'il est ainsi qu'aucun des Papes precedents ne s'en soit iamais plainct, ains les ont tous recogneuës & reputées pour bonnes, puis que tant par elles mesmes qui sont assez notoires, que par la continuelle assistance de leurs Nunces residents en ceste Republique, ils ont eu cognoissance d'icelles, les ont veuës & approuuées par leur silence, à qu'elles fins peut-on auoir persuadé sa Sain-

Steté de se transporter ainsi, & d'exciter telles émotions? si ce n'est par-aduantage qu'ils desireroient volontiers que toutes les Principautez, tous les Royaumes, & tous les Estats cedassent à sa puissance, & fleschissent sous le ioug de sa volonté, qui est vn desir si arrogant & desmesuré, qu'estant du tout contraire à la raison & à la doctrine de Iesus-Christ, il ne peut estre soustenu ny approuué de persone.

Or ie voy que ce qui a esté dict iusques icy est suffisant pour faire apparoir de la iustice qui est en la cause de la Republique touchant les loix par elle establies. Reste à parler maintenant de ses iugements, que le Pape pretend estre contre toute raison & equité, par lesquels elle punit les meschants & peruers, qui sous l'habit Clerical veulent couvrir & sauuer leur vice & impiété. Et c'est grande merueille que sa Sainteté soit venue à ceste resolution en vn temps & en vne occasion si peu conuenable, mesmes en faueur d'aucuns qui pour les cas à euls imposez & dont ils sont à present conuaincus, ne meritent aucune aide ou protection en vertu des priuileges Ecclesiastiques, mais vne rigoureuse recherche & animaduersion pour l'enormité de leurs crimes. L'vn d'entre euls est accu-

fé d'auoir attenté à l'honneur & pudicité d'vne honorable Damoiselle de son pays, qui est sa parente: mais ceste Dame pudique ayant repoulsé tous ses efforts & la violence de ses effrenez desirs, qui estoient assez manifestes & scandaleux à toute la ville de Vincense, cest homme desreglé en ses passions ne laissa de continuer ses deporteméts insolents, & deshonnestes poursuites, mesmes en public par les ruës, & dans les Eglises: & en fin apres auoir tenté tous les moyens qui luy ont esté possible pour venir à bout de ses impudics desseins, & se voyant hors de toute esperance de les pouuoir executer, par vne sorte de vengeance infame il fist souiller & infecter la maison de ceste Dame avec ordures & vilenies, se seruant (comme on a souuent accoustumé de faire) de mains prophanes & sacrileges, par vn courage vil & abject, qui ne respire aultre chose qu'une vindicte pleine d'opprobres & calomnies.

Oultre ce il est chargé d'auoir brisé & rompu des mandements & Rescripts de la Republique, où estoit apposé le Seau de S. Marc, & les auoir arraché des lieux où ils estoient affichez, avec paroles d'iniure & de grand mespris, qui est proprement vn crime de leze Majesté.

L'autre est preuenü de crimes si atroces & si enormes qu'on ne les scauroit ouir, exprimer, ou imaginer sans horreur. C'est vn grand forfait en vn Ecclesiastic (bien qu'il n'ait encore l'ordre de Prestre) de violer la pudicité de plusieurs personnes, mais beaucoup plus grand s'il est commis au mespris du mariage, le polluant par vn infame adultere; & d'y adiouster des meurtres, homicidant les marits & alliez, & vsant ordinairement à cest effect de venins & poisons, comme de moyens fort familiers pour executer vne entreprise meschante & pernicieuse: cest chose qui surpasse toute cruauté. Mais encore de mespriser la tres-estroicte & tres-sainte conionction qui est entre le frere & la sœur pour assouuir la rage d'vne execrable cupidité, c'est vne impieté tant abominable, qu'elle doibt estre plustost qualifiée du nom de brutalité que de quelque vice ou meffaiet qu'on pourroit imputer à vn homme non du tout brutal & aliéné de raison.

Or à l'occasion de ces deuls prisonniers, que ie ne veuls point encore dire Criminels iusques à la condamnation & sentence definitive (bien qu'ils soient chargez & preuenus de tous ces grands crimes dont nous venons de parler) le Pape a pris subject d'entrer
en

en ceste contention avec la Republique, porté comme on estime du zele de maintenir la Iurisdiction Ecclesiastique. Mais on peut croire encore pour le vray qu'il y a esté poulcé par les persuasions & suggestions de ceuls, qui taisants ce qu'il falloit dire à sa Sainteté, ont dict ce qui se debuoit laisser au silence, ou bien descouvrir par vn aultre moyen : & partant si on veult rechercher quelque excuse pour le Pape de ce que sur vn tel subject il a mis en auant des preten-
 sions qui pourroient, si elles auoient lieu, sub-
 uertir toute la Chrestienté, on n'en peut trou-
 uer aucune legitime, ou tant soit peu plausi-
 ble ; sinon que lon die qu'il a esté mal infor-
 mé du faict dont est question par des rap-
 ports mensongers & pleins de passions, sur
 lesquels avec le grand zele qui est en luy, il a
 fondé son intention : En quoy comme on a
 subject de se doulloir de la mauuaise fortune
 de ce temps qui n'a pas voulu que le bõ zele
 de sa Sainteté fust accompagné de quelque
 patience ou delay, afin qu'en temporisant vn
 peu avec prudence & longanimité, qu'elle
 fçait mieuls que tout aultre estre bien sean-
 te & conuenable à la grandeur & dignité de
 son ministere, & en vne cause de telle im-
 portance, elle eust peu cognoistre plus par-
 D

faictement & discerner toutes les circonstances du temps, des lieux & des personnes pour escouter & consulter seulement les plus sages, plus sincerés, plus fidels, & mieulx entédus, reiettant ceuls qui ont l'esprit plein de dissimulation, d'astuce & perfidie, & qui se laissent emporter aus mouuements de leurs passions: Aussi debuons-nous esperer que venant à prendre conseil à soy-mesme sur la simple verité du faict, & sur les considerations, qu'elle y scaura bien apporter, elle se desisterra de ses entreprises, & se remettra au chemin où la voix de la raison la rappelle, & la paix & le repos non seulement de l'Italie, mais aussi de toute la Chrestienté, & la protection de la foy & vraye Religion, qui parmy ces troubles est en grād danger de souffrir quelque schisme & diuision. Mais pourquoy ces esprits, qui sont autheurs de ces contentions, au lieu d'amoindrir les fautes de ces deux prisonniers, ne les ont-ils représentées cōme elles sont? Et pourquoy au lieu d'exalter leur qualité, n'ont-ils blasmé leur maniere de suivre & leurs mauuais deportements, & donné à entendre, bien qu'il ne fust pas necessaire, qu'en effect ils estoient de cōdition laïque, veu qu'ils n'ont seulement que l'habit & le nom d'Ecclesiasticks? Pour-

quoy aussi au lieu de taire la souffrance des
 subiects de ceste Republique, particuliere-
 ment de ceuls qui sont interessez par moyès
 insupportables, n'ont-ils faict recit de leur
 grande patience & tolerance contre tant
 d'iniures? Ils pouuoient encore iustement, &
 avec verité remonstrer à sa Sainteté, que la
 raison, par laquelle la Republique doit re-
 cognoistre qu'elle tient de Dieu seul son au-
 thorité, & l'usage & les coustumes obseruées
 de temps immemorial la contraignoient à
 chastier semblables crimes sur les personnes
 Ecclesiastiques: mesmes ils pouuoient ad-
 iouster, que tel usage & telles coustumes
 auoient esté approuuées pour bonnes &
 sainctes par plusieurs Papes, comme il appert
 par leurs Breuets & Rescripts: & apres qu'ils
 en seroient deuëment informez faire, pa-
 roistre à sa Sainteté que l'exercice de ceste
 Iurisdiction estoit obserué non seulement
 en la ville de Venise, mais encore par toutes
 les autres villes de son Domaine: Et s'ils n'a-
 uoient vne entière cognoissance de tous
 ces cas, il estoit prealable pour s'y comporter
 avec plus de circumspection d'en rechercher
 exactement la verité, auant que d'imprimer
 en l'esprit de sa Sainteté des conceptions
 qui en sont si esloignées, ou plustost du tout

contraires.

Or puis que tout cecy n'a esté fait par ceuls qui y estoient obligez, maintenāt il sera bon de le mettre en euidence pour vne bonne fin : & ayant touché ce qui est du fait de ces deus prisonniers, il est expedient de rapporter les considerations qui se rencontrent en la matiere. Et premierement il faut voir si les Magistrats ausquels appartient de bien gouverner les subiects & leur faire bonne iustice, doibuent negliger leurs plaintes, ou les renvoyer à aultres, cōtre la coustume ordinaire, gardée de tout temps & en tous cas semblables. Mais de n'y tenir la main & attendre le remede d'ailleurs, que seroit-ce aultre chose, sinon les abandonner & mettre au desespoir de n'en pouuoir iamais obtenir iustice? Seront-ils contraints estans si grièvement offensez de comparoistre par-deuāt des Iuges fort esloignez ou incognus, avec vne grande despense & incommodité, ou pour mieuls dire avec vne ruine totale, pour obtenir vn iugement d'un Prince estranger, ou de ses Officiers, qui ne les pourroit aucunement ou fort peu soulager & recompenser de leurs dommages & interests? Et qui ne sçait combien de longueurs & de peines il

fault supporter pour auoir iustice pardeuant les Iuges Ecclesiastiques, & quel soulagement en peut retirer celuy qui a esté interessé en ses biens, vie & honneur, tandis qu'il verra que celuy duquel il aura receu l'outrage & iniure, a esté legerement puni par l'iniunctiō de quelque penitēce salutaire, ou autre semblable, qui regarde bien le salut de l'ame, mais n'apporte rien à la satisfaction de celuy qui est oppressé? Et si lon dit qu'en certains cas on peut renuoyer le criminel pardeuant le Iuge Seculier, on pourra de là inferer assez clairement, que tels forfaitts, chastiments & condamnations, sont de la iurisdiction & cognoissance de celuy qui domine sur les choses temporelles, & nō pas de celuy qui a seulement charge des spirituelles sur les Estats des autres Princes. Et si on veult que le Iuge Ecclesiastic, qui en ce cas n'est autre que Iuge temporel, soit competāt pour cognoistre des crimes enormes, pourquoy le Prince, ou son officier ne le pourra-il mieuls faire, puis que par droit de souueraineté il peut ordonner, & mieuls iuger toutes les particularitez & circonstances du faict, la raison & l'usage du pays & tout ce qui est requis pour rendre vn bon & equitable iugement? faudra-il que ceuls qui sont outragez par les Eccle-

fiastics aillent comparoistre en Cour de Rome, ou par-deuant ses officiers pour demander iustice, les vns pour la mort de leurs aliez, les autres pour la violence & dommage à euls fait tant en leur honneur, qu'en leurs biens? Certainement ce seroit perdre tous les subjects, les priuant à leur plus grand besoing du moyen d'auoir recours à leur Prince, & d'en pouuoir estre aidez & secourus, & par ainsi leur donner subject de changer l'amour & la crainte qu'ils luy doiuent, en peu de respect & affectiō, ou plustost en inimitié, mesmes de tomber en desespoir, & par leurs propres mains, au grand scandale & mespris, non seulement des persones, mais aussi de l'ordre Ecclesiastic prendre la vengeance, & faire euls-mesmes la iustice qu'ils ne pourroient obtenir d'ailleurs: & possible qu'il ne seroit pas bon de les vouloir retenir, & que le Prince mesme ne le pourroit pas faire, ou s'il le vouloit pour quelque bonne consideration, encore les faudroit-il appaiser en leur rendant la iustice qui auroit esté deniée.

Or en ces cas dont nous venons de parler, qui ne void que ce seroit vne extrême affliction & douleur à ceuls qui sont si excessiuement oultragez, ou interessez en la personne d'autrui par homicides, par empoisonne-

ments & autres semblables impietez, s'ils ne trouuoient le chemin ouuert pour recourir à leur Prince naturel, afin d'estre supportez & garentis contre tant d'oppressions tyranniques, & qu'à cest exemple plusieurs autres encore voyant ne pouuoir estre secourus, seroient contraincts de soubmettre le col au ioug, & desesperant de leur salut se reduire à desplorer leurs miseres & infelicité? qui ne sçait pareillement que la ville de Vincense qui est pleine de noblesse, & d'un peuple genereux & fort exercé aux armes en toute sorte de hazards & occasions, pouuoit encourir quelque peril de diuisiõ & de dissention, tandis qu'en tels accidens où il y va de l'honneur & du bien public on a mesprisé les moyens d'y remedier? Quel exemple seroit-ce aux autres d'obeyr & de porter reuerence aux mandemens & ordonnances publiques, voyant que celuy qui les a malicieusement enfrainct & mesprisé en demeure impuny? vne ville est en danger de se troubler, & de mettre diuision entre les Citoyens, le Prince n'aura-il pas le pouuoir d'y apporter le remede necessaire par le moyen de la iustice? Et s'il se trouue des personnes qui soient non seulement contumaces à ses commandemens, mais encore qui les mesprisent tout

ouuertement, & les foulent aux pieds, se roidissants d'un cœur rebele contre sa puissance, ne pourra-il les chastier? Et s'il ne le peut faire, quel sera donc son pouuoir & son autorité? Vn Royaume ne doit auoir deux chefs: c'est la doctrine des sages & bien auisez Politiques des siècles passez, & n'y en eust iamais d'autres: Et si on la veult conferer encore avec la vraye doctrine de nostre Religion, & avec les paroles, preceptes, & exemples de Iesus-Christ, & de ses disciples, de tous les Saints Peres & Docteurs de l'Eglise, il sera fort facile d'esclaircir & prouuer ceste maxime pour ce qui regarde & concerne les choses temporelles; mais ie n'entend pas entrer en ces considerations, laissant cela pour quelque autre qui le sçaura bien faire, & avec plus d'opportunité. Pour ma part il me suffira de dire que la ville est composée de Citoyens, & que les Citoyens sont ceux qui iouyssent du bié de la police en ce qu'ils sont conseruez en paix les vns avec les autres & maintenus contre les estrangers, leurs moyens mis en bonne garde & seureté, & finalement en ce qu'ils ont tout le bonheur & la felicité, où ils peuuent aspirer par le moyen d'une parfaicte vnion; ce qui est impossible d'obtenir sans la communion

des loix, de la police & des iugemens. C'est vn ordre naturel, qui se doit garder en toutes les villes, duquel si aucune persone en vn cas particulier, ou pour son propre merite, ou pour autre iuste consideration est exemptée, c'est son deuoir de recognoistre qu'elle tient ce bien de la puissance & grace speciale de celui qui le peut conceder, & sans la permission & volonté duquel nul ne peut auoir ce priuilege. Mais celuy qui n'en est point exempt, & qui en toutes les commoditez de la vie ciuile veut iouyr du priuilege des Cytoyens, il doit pareillement selon la raison naturelle estre subiect aux loix & ordonnances, par lesquelles la recompense est assignée aux bons & punition aux meschans. Et par ceste raison, qui est particulierement de l'autorité de la ville & du Prince sur les Citoyens, laquelle Iesus-Christ n'a point abolie, ains confirmée par sa Diuine parole, disant, qu'il ne vouloit oster les Royaumes de la terre, ny auoir aucune part en iceuls pour le regard des choses humaines & temporelles, il appert clairement que la Republique, comme vn Prince libre, qui ne depend d'autrui, a par droit de Principauté vne puissance absoluë sur tous ses subiects indifferement: & si quelquefois pour vn tesmoignage

de douceur & de bonne volonté elle a laissé de l'exercer sur aucuns, il ne faut inferer de là qu'elle ne le puisse faire: mais parce que selon le temps, elle a trouué bon de faire ainsi, ayant égard à la legereté de la matiere, & à la qualité des persones. Et si quelques Empe- reurs & Rois en leurs Royaumes & Prouin- ces ont pour quelques cas particuliers seule- ment exempté les Ecclesiastics de leur Iurif- diction, comme il se void par l'ordre & la for- me qu'on y tient & obserue, qui peut nier que la Republique dont la grandeur & di- gnité suit immédiatement celle des Roys, n'aye peu faire le semblable? Et si par l'autho- rité tant des Theologiens que Iuriconsul- tes on veult soustenir que ceste exemption qu'ont les Ecclesiastics vient de la concessiō & priuilege des Princes, comme il est porté par leurs escripts, c'est seulement pour auoir lieu au Domaine particulier de celuy qui l'a octroyée: mais en ceste Republique qui a tousiours esté libre, on peut dire que tel pri- uilege ne doit estre admis, s'il n'appert de la concession, & puis qu'il est seulement intro- duit par l'usage & par la coustume: pour- quoy en opposant vne coustume & usage contraire, ne pourra-elle se preualoir de ce qu'elle a retenu, & continuellement exercé

la Iurisdiction és cas priuilegiez, laissant seulement les matieres legeres à la cognoissance & au iugement des Ecclesiastiques ? & pour le regard des choses grandes & plus importantes se reseruant tousiours son authorité, laquelle outre ce qu'elle est fondée en la puissance que Dieu luy a donnée, se iustifie encore clairement par la forme & coustume qu'elle a tenu & obserué de tout temps au gouuernement & administration de son Estat. Vne coustume appuyée de tant de raisons qui a mesme force de loy, & qui est accompagnée de tant de iustes & grandes considerations, apres auoir esté gardée par tant d'années & tant de siecles, doibt-elle maintenant estre reuoquée en doute ? Et quelle chose se pourra dire ferme & stable sous le Ciel, puis que celle-ci qui est affermie par le cours de plus de mille ans vient à estre debatüe, & mise en contention ? Le gouuernement uniforme de ceste Republique est tel, qu'outre la loitiange qu'on luy en donne, il se fait encore admirer par tout, mesmes iusques aux parties du monde les plus esloignées. Et toutes-fois il y a pour le present des personnes qui y trouuēt à redire & le veulent corriger. Tous les Princes & tous les peuples l'ont loüé & recommandé mesmes au fait dont est que-

tion tous les Papes precedens, & particulièrement quelques-vns d'iceuls par leurs Rescripts & Breuets l'ont approuué; & neantmoins le Pape seant à present, mettant à mespris ce iugement vniuersel, & specialement celuy de ses predecesseurs, entreprend de l'enfraindre & le blasmer. Et puis qu'on ne peut douter de l'exercice de telle iurisdiction, eu égard à tant d'executions de mort faictes és personnes de ceuls qui estoient atteints & conuaincus de crimes énormes, tant en la ville de Venise, comme aux autres de cest Estat, comme il est notoire à vn chacun, il est bon que l'on sçache qu'aux Archiues de la Republique sont plusieurs Breuets de diuers Papes, comme de Sixte IV. d'Innocent VIII. d'Alexandre VI. de Paul III. & d'autres, qui en termes fort clairs & expres cōtiennent deux choses: l'vne que la coustume des iugemēs susdits doit estre presupposée bonne & louable, & qu'elle a son origine legale & canonique: l'autre, qu'il est enioinct aux Patriarches & à leurs Vicaires de ne la point interrompre, mais bien d'assister à l'interrogatoire & audition des criminels, quand ils y seront appelez. Et pour en rendre la raison, ils disent, que leur assistance y est necessaire, à fin que les criminels qui seroient Ec-

clesiastiques puissent accuser les delinquants ou leurs complices sans encourir irregularité: D'où s'ensuit qu'ils n'ont iamais voulu censurer ou limiter la iurisdiction du Magistrat seculier, ains plustost qu'ils l'ont estimée bonne & équitable: Et ces Breuets portent encore qu'elle doibt auoir lieu non seulement pour les cas qui peuuent arriuer dans la ville de Venise, mais aussi par tout le Domaine: ce qui est si clairement exprimé, qu'il ne se peut desirer dauantage: de sorte que par la seule lecture toute persone de mediocre entendement peut bien recognoistre que d'y apporter quelque doute, c'est chercher le nœud au iōg, & mettre de la difficulté où il n'y en a point. Et partant sa saincteté deburoit trouuer bon & auoir pour agreable que la iustice se fist, que les delinquants fussent chastiez, qu'on ostant le scandale & opprobre qu'apporte telle sorte de personnes vicieuses & deprauees, & qu'en fin par l'exemple de leur chastiment & de l'execution qui s'en feroit aux mesmes lieux où ils auroient commis le delict, les autres s'abstinsent de pecher à l'aduenir, & continuer en leur mauuaise vie.

Or que la iustice ne soit bien & deuement administrée en ceste Republique, nul n'en peut doubter, parce qu'outre le tesmoignage

qu'il y en a de ce que plusieurs se sont volontairement soubmis à ses loix pour ceste consideration particuliere & autres, on peut voir la condition, qualité & temperance des iuges, leur equité & moderation, le nombre de ceux ausquels est commise la charge & administration d'icelle, les loix de toute ancienneté establies contre les meschants, & autres circonstances qui la rendent non moins desirable aux estrangers qu'à ses subjects, veu que des autres pays loingtains quelques villes & peuples fort notables y sont accourus pour apprendre d'elle la maniere de bien rendre & administrer la iustice: & toutes ces remarques sont autant de preuues & de lumieres pour faire dauantage paroistre la verité. Mais parce qu'il n'est pas necessaire de s'arrester sur ce point, qui comme i'ay dict, ne peut estre douteux, estimant encore auoir satisfait la Republique en ceste partie, ie passeray à l'autre comme ie m'y suis obligé cy deuant, pour resoudre quelques foibles raisons sur lesquelles les Ecclesiastiques fondent leurs prétensions, & par après toucher briefuement les particularitez de la loy qu'ils appellent Amphiteotique, & avec icelle mettre fin à ceste defense.

Toute la substance de leurs raisons consi-

ste en ce seul & vnique moyen, que les loix de la Republique, & les iugemens qu'elle rēd contre les Clercs, mesmes és crimes énormes & priuilegiez sont contre la liberté Ecclesiastique, à laquelle contreuenir c'est chose condamnée par les Canons: Que c'est cōtre la pieté & Religion de prohiber que leurs biens temporels n'augmentēt, & de leur empescher l'edifice des Eglises, qui sont choses approuuées par les Docteurs & Iurisconsultes.

Or il y auroit vn beau subiect de traiter & discourir de ceste liberté Ecclesiastique, veu que l'on n'a point encore decidé ny déterminé en quoy veritablement elle consiste, & les opinions de la vraye definition d'icelle sont fort diuerfes, mesmes en ceulx qui en ont traitté: parce que quelques-vns veulent qu'elle soit pour la conseruation des priuileges, aucuns pour l'asseurance de ce qui leur appartient par droit cōmun, & d'autres pour empescher qu'il se face contre eulx aucune chose qui leur puisse dōner de la crainte & plus de hardiesse aux Seculiers. La vraye liberté Ecclesiastique deuroit estre mise au poids de celle que veut auoir Iesus Christ & ses Disciples conformément à la doctrine Euangelique, & à toute la sainte Escriture

qu'il nous a laissée pour testament, & au desir de l'Eglise, & des tres-saincts & venerables Conciles œcumenics, qui vrayement est appelée Canonique avec ce mesme nom de Canon : mais parce que cela requiert beaucoup de temps, & qu'un autre le pourra faire avec plus de commodité, il me suffira de dire que l'on peut clairement iuger qu'aucuns Ecclesiastiques voudroient en effect par le moyē de ceste liberté vsurper celle d'autrui, & faire librement, ou pour mieuls dire licencieusement tout ce que bon leur sembleroit. Quelques autres au contraire, croyent & tiennent pour asseuré, que telle licence ne doit estre supportée, puis qu'il ne se trouue aucun Canon, ny aucune doctrine Catholique, qui leur donne liberté de faire iniure & outrage à persone, ny de pecher contre le public ou particulier.

La liberté Ecclesiastique ne veut dire autre chose que liberté de l'Eglise, & les Ecclesiastiques, qui entant que tels font partie d'icelle & sont ses ministres, ne doiuent pretendre autre liberté que celle mesme de l'Eglise, & ceste-cy consiste principalement au deub de leur ministere, qui est d'enseigner & ensuiure la doctrine & les preceptes de Iesus-Christ, de ses Apostres, & de son Eglise : & qui les trou-

trouble ou empesche en l'exercice de ceste charge, il s'oppose directement à la liberté Ecclesiastique.

Or qui est celuy qui puisse dire que la Republique l'aye empesché en quelque façon que ce soit? tant s'en faut qu'il soit ainsi, que plustost elle a fait tout au contraire, comme il appert clairement de ce que dessus, où par vn ample discours a esté monstré que dès le point de sa naissance elle auoit porté tousiours au cœur & en ses œuures les vrayes marques de la Religion Chrestienne, & procuré de l'accroistre & dilater iusques aux pais loingtains, avec vne perte notable de ses Citoyens & grande despenſe de ses thresors, de quoy peuuent bien rendre tesmoignage les entreprises faictes en la terre Sainte contre les infidelles, & contre la ville de Constantinople qui estoit desobeyſſante à l'Eglise Romaine, la protection des Chrestiens contre les Sarrafins par vne longue suite d'années, & tant de secours qu'elle donne aux Papes contre les plus grandes puissances & principautez du monde, les remettant & reintegrant en leur siege: & bref tant de trauaux & de peines que (sans rechercher de plus long temps) elle souffre depuis deux cens ans en ça, pour resister & se maintenir contre la ter-

reur & les forces immenses de celuy, qui iusques aujourd'huy sans le rempart qu'elle luy oppose à tout coup, auroit possible desia fait des ruines desplorables, & des vsurpatiõs sur la Chrestienté.

Ainsi l'on voit que la Republique a grandement aidé à la liberté Ecclesiastique, taschant par tous moyens de maintenir, aceroistre & defendre la Religion Chrestienne, & ayant vn soing singulier que tout le ministre de l'Eglise fust librement exercé, que la bõne doctrine, les predications, l'administration des Sacremens, & tous autres offices de pieté, qui tendent à la gloire de Dieu & au salut des fidelles, fussent admis & receus non seulement par les siens, mais aussi par les estrangers, y pouruoyant à cest effect de personnes dignes & capables pour ces saints & loüables exercices, qui sont les bons Ecclesiastiques; leur donnant des commoditez pour viure, & fondant les Eglises & Monasteres, qu'elle a non seulement doté & enrichy de ces grands biens & reuenus qu'ils possèdent, mais aussi décoré des venerables reliques de plusieurs Saints, lesquelles en témoignage d'vne rare pieté ont esté apportées des regions loingtaines pour reposer en ces lieux sacrez. Comment doncques peut-elle estre arguée d'auoir contreuenu à la li-

berté Ecclesiastique? elle veut bien empêcher le mal, & les mauvaises œuvres, qui tant s'en faut qu'elles soient Ecclesiastiques, ou spirituelles, que plustost elles sont du tout charnelles & mondaines, & n'ont aucune conuenance avec l'Ecclesiastic ou le spirituel, ains lui sont du tout contraires & ennemies: elle veut auoir en son Estat autant & plus d'Eglises, de Monasteres, de Prestres, & de Religieus qu'il est requis & necessaire pour le gouvernement spirituel de son peuple & de ses subjects: elle veut aussi qu'ils ayent de grandes richesses & commoditez, mais que tout soit reduit en Eglises & Monasteres, que tout passe és mains de leurs ministres, & qu'à ceste cause ses subjects soient spoliez de tous leurs moyens, & reduicts à vne indigence & extrême necessité, & les facultez publiques entierement espuisées, elle ne l'estime iuste ny conuenable, & ne peut, ny ne doit le permettre. Que si quelques Canons semblent en apparence dire le contraire de ce que la Republique tient sur ce poinct, on ne manquera pas pource de trouuer vne facile responce, tirée des Canonistes mesmes, qui disent que le droit Canon condamne les statuts & ordonnances des Princes qui prohibent totalement le commerce & fre-

quentation avec les Ecclesiasticks, & leur ostent le moyen de viure, ne voulant que les Laïcs leur püssent vendre ny pain, ny vin, ny faire moudre leur grain, ny les accommoder d'aucune autre chose semblable qui soit nécessaire à leur vie & entretenement. Et plusieurs tiennent que tels Canons n'ont lieu, sinon contre les loix qui généralement & absolument, & sans raison defendent l'alienation des biens Laïcs aux Ecclesiasticks. Et quelques autres sont d'aduis que les Edicts des Princes ne sont reiectez & condamnéz par les Canons, sinon lors qu'il appert, ou que l'on peut presupposer qu'ils ont esté faicts en haine des Ecclesiasticks, ou que le but & intention du Legislatteur a esté de leur porter preiudice: toutes lesquelles conditions ne se peuvent rencontrer és loix de la République, puis qu'elles ne defendent pas absolument l'alienation, ou la construction de nouvelles Eglises & Monasteres, mais seulement au cas qu'on le voulust faire sans la permission du Prince. On ne peut dire que ces loix ayent esté faictes sans iuste cause, estant iustifié par ce discours comme elles sont fondées en plusieurs grandes & legitimes considerations qui ont esté bien pesées & examinées en l'institutio d'icelles: outre qu'elles ne font aucune mention expresse ou tacite des biens

& facultez des Ecclesiastiques; ains parlent seulement des biens & personnes laïques, leur prescriuant la regle & la façon d'en disposer plustost en vne sorte qu'en vne autre: Que si de la commodité des Laïcs en resultoit hors l'intention du Legislatteur quelque incommodité aux Ecclesiastiques, quelle coulpe luy peut-on attribuer? mais ie demanderois volontiers si vn particulier regle sa famille comme bon luy semble, & ordonne que tant de deniers soient employez aux edifices, tant pour le viure & entretenement, & tant pour les aumosnes aux personnes Ecclesiastiques, & qu'avec le changement & diminution de sa fortune il vienne à retrancher sa despenſe, l'Ecclesiastique à qui on auoit destiné telle quantité d'aumosnes peut-il dire avec raison que ce pere de famille fait mal? le doibt-il reprendre, & alleguer que ce retranchement & diminution soit contre la liberté Ecclesiastique: Or le Prince est vn pere de famille, & en temps & lieu il dispose de ses moyens & de ceuls de ses sujets, il edifie des Eglises, donne la place pour les bastir en ses villes & par tout son Estat, distribue les possessions, & les rentes en suffisance, & avec grande pieté & Religion: s'il s'aduise qu'il a assez eslargy la main, & que s'il

continuë, la famille (qui est son peuple) en pourra auoir disette, la mesme pieté, Religio & iustice, le poulsent à se restraindre en patrie : & partant il aduertit ses enfans, c'est à dire ses subjects, de ne plus tant despendre qu' auparauant; & dit qu'il veut voir & regler leur despenſe, & les reduire à sa volonté, qui ne regarde & ne respire que leur bien & vtilité, dira-on qu'il ne le puisse faire, & que pour vn Canon mal entendu ou interpreté en mauuais sens, qui selon l'opinion d'aucuns n'oblige point celuy qui ne l'a receu, on doiuë luy defendre telles choses?

A ce propos il est bon que chascun entende que bien qu'un ou plusieurs Canons instituez des Papes dient quelque chose au contraire sur ce qui concerne l'exemption des persones Ecclesiastiques de la iurisdiction des Princes, & que plusieurs ayent escrit sur ce subject & soustenu leur party avec beaucoup de raisons en faueur de leur puissance, toutesfois c'est vne maxime certaine des Canonistes & Iuriscōsultes, que les Canōs traitans de choses temporelles, doiuent seulement auoir lieu en-tant qu'ils sont receus & approuuez du Prince & par lui mis en vsage: & lon a veu ainsi que quelques-vns qui estoient faicts à leur preiudice, ont esté retractez & annullez à leur plainte & instance:

Mais la verité est que les loix de la Republique ne sont pas contraires aux Canons, s'ils sont bien entendus: & par l'exacte interpretation qu'en ont fait les Canonistes sur ce sujet, on peut voir clairement s'il est necessaire que nous rapportions leurs aduis & allegations, où principalement est à noter ce point, qu'il est besoing de regarder la fin & intention principale du Legislatteur, & non la consequence de ce qui en peut prouvenir par quelque cause secõde & accessoire. Que si la principale fin de la Republique en l'institution de ses loix a esté pour conseruer les facultez de son Domaine, & celles de ses subjects, & son repos & assurance, comme de vray il est ainsi, & persone ne dira le contraire; nul ne s'en peut formaliser, ny pretendre aucun droit de les reformer. l'adiousteray encore, que ces loix sont bonnes & Saintes, non seulement pour la fin & intention principale des Legislatteurs, mais aussi pour leur consequence, qui a esté meurement pesée & examinée par la Republique, fort prudente, sage & aduisée, avec tant de considerations qui sont cy dessus remarquées.

Les Ecclesiastiques pourront dire que leurs richesses n'augmenteront pas, que le nom-

bre des Eglises & Monasteres n'accroistra pas, ny les Abbayes & les Commâdes, & que leurs faultes estant punies, la liberté leur sera ostée de faire ce que bon leur semblera. Mais la réponse est fort facile : premièrement, que par les loix de la Republique cela n'est pas absoluëment prohibé, ains ceste augmentation se peut esperer de la pieté, avec le temperament & moderation requise. Et encore qu'il ne leur en prouienne aucun bien ny vtilité, la Republique n'a pas eu toutesfois intention de leur preiudicier, car elle n'a aultre but que de conseruer les biens des Seculiers & ses propres facultez. Et touchât la punition des crimes, ils euiteront assurement les iugemens de la Republique s'ils font bien, & viuent selon leur deuoir, qui est le vray moyē de ne craindre la puissance des princes, commel'a enseigné celui qui fut appelé de Dieu, & enuoyé pour prescher sa doctrine à toutes les nations. Et sur ce qu'ils adioustēt que ces loix leur sont dommageables, ie leur nie cela : C'est faire dommage d'oster à quelqu'un ses habits, ou son viure, ou l'argent ou autres siennes commoditez : mais celuy qui ne veut donner à autrui ses vestemens, ny autre chose du sien, parce qu'il en a besoing, ne fait aucune iniure, ny dommage. Seroit-ce pas vne chose du tout in-

iuste de voir vn Ecclesiastique entrer dans la maison d'autrui pour y prédre ses moyens, ou pour l'offencer en autre maniere, soit en ses biens, ou en sa persone, & qu'au contraire on ne le peut empescher, pour dire qu'en ce faisant on luy causeroit de la perte & du dommage?

Quant à ce qu'ils veulent arguer la Republique de peu de pieté & Religion, suffira pour vne ample response ce qui en a esté dit cy dessus, y adioustant seulement qu'elle est née Chrestienne & Catholique, & s'est conseruée telle par l'espace de douze cens ans continuels, sans iamais se despartir de la foy vniuerselle: qu'elle n'a iamais esté contraincée d'aucune heresie, (qui est vne chose qu'on ne scauroit si aisément asseurer de plusieurs autres parties de la Chrestienté) ains tousiours si obeyssante au S. Siege Romain, que quelques-vns disputants de la vraye succession des Papes contre les aduersaires tirent de grands & tres-forts argumens du respect, honneur, & obeissance qu'elle leur a tousiours rendu. Je diroy quelque chose de ceulx qui sont d'opinion contraire, dont les Ecclesiasticks se peuuent preualoir: mais n'estimant pas qu'il soit besoing d'examiner plus exactement ce qu'ils ont laissé par escrit, ie diray seulement que quel-

ques-vns d'iceuls n'estans paruenus, comme il se void par leurs discours, à la cognoissance de ce gouuernement, que lon peut dire estre l'Architecte des mesmes loix & iugements dont il s'agit, non pas pour leur incapacité, mais bien pour le defaut d'vne longue & continuelle experience, qui est necessaire pour en acquerir la science, ils n'en peuuent donner vne parfaicte resolution comme il est requis; & que d'autres attirez par crainte ou esperance, ou autres semblables passions, & possible aucuns n'estants bien informez de toutes les particularitez que lon doit scauoir en vne matiere si graue & si importante, se laissent facilement induire à prendre leur party: outre que dans les Escrits de quelques-vns de leur profession, longuement versez aux gouuernements publics, & hors de toutes passions, suiuant seulement la raison diuine & humaine (celle-la tirée de la sainte Escriture, qui est le vray & principal Canon, & ceste-cy consistant en l'entendement) lesquels ne sont pas peu, & seroient encore en plus grand nombre s'il leur estoit permis de dire & escrire ce qu'ils en pensent, ont trouué comme i'ay veu, la response suffisante à leurs objections.

Quant au chef des biens Amphiteotics, qui est le premier du Breuet ou Monitoire

publié contre la Republique, il ne se trouue-
 ra persone, qui apres auoir entendu ce que
 ie deduiray icy briuement, ne soit grande-
 ment estonné, voyant de quelle façon on a
 procedé en cest affaire : Ce qui fera d'autant
 plus croire que la bôté du Pape a esté trom-
 pée, & deceuë par les fauls rapports de per-
 sonnes passionnées, qui pour dire en vn mot
 l'ont fait resoudre avec trop de promptitu-
 de. Le Monitoire porte pour le premier
 fondement de la plainte formée par sa
 Sainteté, que la Republique a fait vne loy,
 par laquelle les Ecclesiastiques sont exclus de
 la preference & acquisition des biens Am-
 phiteoties, si bien que ny par aucun droit
 de preference, ny par reünion du domaine
 vtile au direct, ny par deference ils ne les
 puissent acquerir : Neantmoins la verité est
 telle, qu'en la mesme loy, exprimée en ce
 Breuet, il n'est fait aucune mention des biẽs
 Amphiteoties, d'où l'on peut cognoistre
 qu'elle n'a esté non seulement considérée
 avec les motifs & raisons de la Republique,
 mais aussi possible elle n'a esté du tout veüe.
 Il s'agit d'une loy fondée en grandes consi-
 derations touchant le gouuernement & biẽ
 public, qui est le but ordinaire de toutes les
 loix, & des Legislaturs & auteurs d'icelles,
 & auquel pareillement a visé la Republique

qui est estimée fort sage & prudente, & qui en tout temps a fait des loix pleines de tant d'équité & de justice, qu'elles ont esté désirées des estrangers, & admirées & reuerées de tant de peuples ses bons subjects; & toutesfois on veult entreprendre de les reformer, abolir, & déclarer nulles, non seulement sans y apporter aucune consideration deue, mais mesmes sans les voir & entendre. Si celui qui l'entreprend en estoit le Iuge, encore ne le pourroit-il faire qu'avec grande congnissance de cause, & ne l'estant pas, comment peut-on conceuoir que sur vne simple pretension de quelque grief, & sur vn rapport mensonger ou captieux il ait peu sans prendre conseil, comme il est nécessaire en tels cas, & comme le requeroit le merite de l'affaire, non seulement s'y resouldre, mais encore y apporter de la passion, & y proceder par des moyens qui ne peuuent estre aucunemēt approuuez. La Republique a parlé en ceste loy de la preferēce des Ecclesiastiques és biens des Seculiers, lesquels on peut presupposer estre tous d'autre nature que les Amphiteotiques, aucuns prouenant des Ecclesiastiques sans aucune charge, d'autres avec reseruacion de quelque petite pension ou Censue, & d'autres par contract de bail à longues années, qui se peut dire location

perpetuelle: & ces derniers qui sont en grād nombre & quantité sont pour la plus-part depuis plusieurs centaines d'années passez entre les mains des Laics lors qu'ils estoient entierement deserts & abandonnez sans aucune culture, & sans rapporter aulcun profit: Et maintenant que par l'industrie des Laics & à leur peine & despens ils sont mis en bon estat, & biē remparez cōtre les inondations & rauages d'eaus, de sorte que les marescages sont changez en terres labourables & fertiles, est-il raisonnable qu'ils soient frustrez de toute leur esperance & priuez de tous les fruiçts & emolumēts qu'ils en pretendoient retirer? Cest contre toute raison, contre toute honnesteté, & toutes les loix; & ie diray encore contre la Coustume & les iugements: & ne peus croire que ceuls qui par ces moyēs aspirent, à plus grandes richesses, le puissent faire avec conscience. Que la coustume soit telle que nous disons, la chose est claire de soy-mesme: car tant s'en fault que les Ecclesiasticks ayent esté en possession de pouuoir recouurer les biens dont est question és cas sus mentionnez, que mesmes on trouue vn vsage au cōtraire, obserué de tout temps & de toute ancienneté, par lequel il se iustifie qu'infinites alienations de ces biens, faictes par le possesseur Laic à vn autre, n'ont

iamaies esté empeschées par les Ecclesiasticks;
 & que ceuls-cy n'y ont iamaies esté preferez:
 mesmes que quand quelques - vns d'entre
 euls ont demandé la preference, ils en ont
 esté deboutez par les Arrests & iugemens
 du Prince, lesquels sont appuyez sur autant
 ou plus grandes raisons que la loy dont est
 question touchant les biens laïcs, qu'ils ap-
 pellent la Constitution des biens Emphiteo-
 tics. Car si le droict de preference auoit lieu,
 il y auroit tant de confusions & changemēts
 de routs les possesseurs des biens qui sont en
 cest Estat, qu'il n'y demeureroit ville, ny
 Chasteau, ny lieu, ny bourg, ny village, ny
 par-adianture aulcune maison, famille, ou
 persone qui ne courust le peril d'estre spolié
 de ce qui luy appartient, ou de souffrir quel-
 que trouble: & les Testaments, les donatiōs,
 les ventes & achapts, les contractz dotaux &
 aultres conuentions faiētes de bonne foy &
 confirmées par vne tres-longue possession,
 ne seroient en aulcune assurance; & sur ce
 subject naistroient tant de contentions, de
 proces & de discordes, qu'il seroit fort diffi-
 cile ou du tout impossible de les pouuoir ap-
 paier. Ces remuemens sont trop grands &
 trop perilleus, & partant le Prince & la Re-
 publique ne les a iamaies enduré, ains a faiēt
 des ordonnances expressees pour le soulage-

ment des possesseurs des biens, & pour la punition de ceuls qui sont auteurs de tels troubles & empeschemens. Mais parce qu'elles n'estoient pas suffisantes pour reprimer l'immoderée cupidité d'aucuns Ecclesiasticks, qui plus puissants que les aultres commençoient à troubler & molester les Laïcs, la Republique a voulu establir vne Constitution encore plus expresse sur ceste matiere, outre la loy sus-alleguée, pour faire entendre aus Iuges son intention, afin de se regler conformément à icelle en tous cas semblables.

Or on ne peut reuoquer en doubte que la Republique n'ait le pouuoir & autorité d'instituer telles loix : premieremēt, parce que les Iuges Laïcs ont tousiours exercé leur iurisdiction, & pris cognoissance des biens de ceste nature: mesmement les Ecclesiasticks y ont consenty, & ont eu volontairement leurs recours pardeuāt euls : Et estant chose toute asseurée que le Iuge Laïc ne doibt estre réglé d'autre puissance que de celle de son propre Legislatteur qui est Laïque, il s'ensuit necessairement que la Republique a peu iuridiquement faire la loy afin de prescrire à ses iuges vne forme & regle de iuger. On adioute encore que ceste qualité de biens, qui entierement, ou pour la plus grande partie à cause de leur meliorations sont de condition Laïque, ne permet pas que le possesseur puisse se conformer ou recevoir vn autre iugement : Je pourrois dire d'auantage que les Papes mesmes à cause des peuples qui gouvernent par domination temporelle, seroient en danger de grands tumultes & perturbations : Et partant en leur propre cause avec les Ecclesiasticks ils ont fait des regle-

mens se mblables en vn cas bien plus estroict, comme il se void en vne constitution de Boniface IX. qu'il fist sur ceste matiere en faueur de la ville de ferrare, & pour roy encore amener l'exemple de semblables Constitutions & vsages obseruez es autres Estats: Mais voyant que l'abondance des raisons m'emporte hors de mes desseins & conceptions, & qu'outre la briefueté que ie me suis proposé en ce discours, il ne me semble pas raisonnable qu'en vn subject auquel le Pape n'a pas procedé contre la Republique par les voyes deuës & moyens legitimes, à cause dequoy aussi elle n'a estimé qu'il fust besoing de représenter ses raisons, ie me peine d'auantage pour escrire ce que l'on sçaura bien remontrer en temps & lieu: Je viendray à la conclusion; disant, que la Republique estant fondée en tant de raisons, & n'ayant commis aucune faute ou erreur; ains qu'elle auroit failly si elle eust fait autremēt, veu qu'elle auroit manqué à son debuoir, qui est de bien gouverner ses subjects, & conseruer son Estat en bonne paix & tranquillité; ie tiens pour certain qu'elle ne peut estre blasmée avec raison, ny censurée du Pape; & ainsi elle espere & se confie entierement en l'aide & assistance de la Diuine bonté; & par son moyen & faueur elle ne doubte point que la iustice de sa cause ne doigt estre soustenüe par tous les Princes & tous les peuples qui ont pareil interest qu'elle mesme. Et finalement elle s'assure que sa Saincteté, cōduite de son propre iugement, & reiectant le pernicious conseil de ceuls qui par quelque passion luy persuadent le contraire, viendra à recognoistre & approuuer ses iustes raisons & considerations: Ce que ie prie nostre Dieu vouloir permettre pour le bien commun des parties, & de toute la Chrētienté.







